

*Tarikh Dibaca: 30 Jun 2017M | 06 Syawal 1438H*

# **KHUTBAH JUMAAT**

***Tajuk:***

***“APA SELEPAS RAMADHAN”***

***\*\*\****

***Terbitan:***

***Unit Khutbah***

***Bahagian Pengurusan Masjid***

***JABATAN AGAMA ISLAM SELANGOR***



## **SENARAI AHLI JAWATANKUASA KHUTBAH NEGERI SELANGOR 2017**

- 1. SS. Dato' Haji Haris Bin Kasim (Pengerusi)**  
**Pengarah Jabatan Agama Islam Selangor**
- 2. SS. Dr. Haji Anhar Bin Haji Opir (Ahli)**  
**Timbalan Mufti, Jabatan Mufti Negeri Selangor**
- 3. Tuan Haji Idris Bin Ramli (Setiausaha)**  
**Ketua Penolong Pengarah, Bahagian Pengurusan Masjid, JAIS**
- 4. Yg. Berbahagia Dr. Haji Osman Bin Haji Sabran (Ahli)**  
**Pensyarah, Universiti Selangor**
- 5. Dato' Haji Abdul Majid Bin Omar (Ahli)**  
**Ahli Jawatankuasa Fatwa Negeri Selangor**
- 6. Tuan Haji Hamid Bin Md Isa (Ahli)**  
**Pensyarah, Kolej Universiti Islam Selangor**
- 7. Tuan Haji Md. Sahari Bin Abdullah (Ahli)**  
**Ahli Jawatankuasa Fatwa Negeri Selangor**
- 8. Tuan Haji Abdul Halem Hapiz Bin Salihin (Ahli)**  
**Ketua Penolong Mufti (Fatwa), Jabatan Mufti Negeri Selangor**
- 9. Ustaz Muhammad Farhan Bin Wijaya (Ahli)**  
**Imam Besar Masjid Sultan Salahuddin Abdul Aziz Shah**
- 10. Ustaz Indera Shahril Bin Mohd Shahid (Ahli)**  
**Pegawai Majlis Agama Islam Selangor**
- 11. Ustaz Hairol Azmi Bin Khairudin (Urusetia)**  
**Penolong Pengarah Unit Khutbah, BPM, JAIS**



## **"APA SELEPAS RAMADHAN"**

الْحَمْدُ لِلَّهِ الْقَائِلِ: فَاسْتَقِمْ كَمَا أَمَرْتَ وَمَنْ تَابَ مَعَكَ  
وَلَا تَطْغَوْا إِنَّهُ بِمَا تَعْمَلُونَ بَصِيرٌ<sup>1</sup>  
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ  
أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى  
سَيِّدِنَا مُحَمَّدٍ وَعَلَىٰ آلِهِ وَأَصْحَابِهِ أَجْمَعِينَ.  
أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ، أُوصِيكُمْ  
وَأَيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى:  
يَا أَيُّهَا الَّذِينَ آمَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ  
إِلَّا وَأَنْتُمْ مُسْلِمُونَ.

**Muslimin yang dirahmati Allah sekalian,**

Marilah kita tingkatkan taqwa kepada Allah SWT iaitu dengan mengerjakan segala perintah-Nya dan menjauhi segala larangan-Nya. Lebih-lebih lagi selepas berlalunya bulan Ramadhan baru-baru ini. Kita hendaklah berusaha dengan bersungguh-sungguh untuk terus meningkatkan kualiti iman dan amal soleh. Semoga kita mendapat keredhaan Allah SWT serta perlindungan daripada api neraka.

Tajuk khutbah kita hari ini ialah **"APA SELEPAS RAMADHAN?"**.

**Hadirin yang dirahmati Allah SWT sekalian,**

<sup>1</sup> Surah Hud : 112



Hari-hari yang berlalu adalah sebahagian daripada umur kita. Setiap hari yang pergi bermakna umur kita semakin berkurang, dan kubur semakin hampir tanpa jurang. Lakukanlah amal soleh sebanyak-banyaknya dengan penuh keikhlasan. Sesungguhnya kita akan berdiri di hadapan Allah SWT pada suatu hari kelak mengharapakan hasil daripada amal soleh yang pernah kita kerjakan.

Beberapa hari yang lalu di dalam bulan Ramadhan yang merupakan bulan rahmat, keampunan dan kelepasan dari api neraka, kita telah berpuasa pada siang harinya, qiyam pada malamnya, kita tinggalkan nafsu syahwat, kejahatan dan maksiat kerana takutkan Allah SWT. Hari-hari tersebut telah berlalu pergi, dan malam-malam itu tidak akan kembali lagi, namun ia tetap termaktub pada buku catatan amal. Ia bakal dipertontonkan pada hari kiamat nanti, hari yang tiada seorang pun akan dizalimi.

Sesiapa yang cemerlang bulan Ramadhannya dengan amalan kebaikan, maka bersyukurlah kepada Allah SWT dan tingkatkan lagi amal soleh selepas Ramadhan serta teruskan segala amal kebajikan. Manakala bagi mereka yang cuai dan buruk amalannya, beristighfar dan bertaubatlah kepada Allah Azza wa Jalla dan segera menebus kekurangannya. Selagi umur masih berbaki, hapuskanlah kejahatan itu dengan melakukan kebaikan sebanyak-banyaknya, semoga ia menjadi kaffarah dan benteng daripada azab Allah SWT.

Diriwayatkan daripada Abu Dzarr R.Anhu beliau berkata bahawa nabi SAW bersabda:



# إِتَّقِ اللَّهَ حَيْثُمَا كُنْتَ وَأَتَّبِعِ السَّيِّئَةَ الْحَسَنَةَ تَمْحُهَا وَخَالِقِ النَّاسَ بِخُلُقٍ حَسَنٍ

*"Bertaqwalah kepada Allah di mana sahaja kamu berada, dan turutilah kejahatan dengan kebaikan yang akan menghapuskannya, dan bergaullah dengan manusia dengan akhlak yang baik".*

*(Riwayat al-Tirmizi).*

## **Para tetamu Allah sekalian,**

Seorang mukmin sejati akan meninggalkan bulan Ramadhan dengan penuh kesedihan, sebaliknya seorang munafik pula akan meninggalkan Ramadhan dengan kegembiraan. Mukmin yang sebenar adalah sentiasa mengharapkan agar segala amalannya sepanjang bulan Ramadhan diterima oleh Allah SWT. Berbeza dengan munafik yang menyambut pemergian Ramadhan dengan maksiat dan kelalaian.

Sebab itulah, kita dituntut dan disunatkan untuk meneruskan ibadah walaupun selepas berlalunya Ramadhan dengan melaksanakan puasa sunat enam hari pada bulan Syawal ini. Abu Ayyub al-Ansari R.Anhu berkata bahawa nabi SAW bersabda:

# مَنْ صَامَ رَمَضَانَ ثُمَّ أَتْبَعَهُ سِتًّا مِنْ شَوَّالٍ كَانَ كَصِيَامِ الدَّهْرِ

*"Sesiapa yang berpuasa Ramadhan, kemudian diikuti selepas itu dengan enam hari daripada bulan Syawal, maka seumpama berpuasa sepanjang tahun.*

*(Riwayat Muslim).*



Apalah sangat dengan enam hari ini jika ingin dibandingkan dengan sebulan Ramadhan yang telah kita tempuhi, namun apabila kedua-duanya digabungkan maka fadhilatnya menjangkau nilai dua belas bulan. Islam ingin memastikan kita sentiasa berada dalam zon ibadah dan amal soleh tanpa terputus.

### **Hadirin yang dirahmati Allah sekalian,**

Islam menganjurkan kita agar beristiqamah dalam melakukan ibadah. Amal soleh itu bukan khusus hanya dalam bulan Ramadhan. Sesungguhnya perintah Allah SWT adalah wajib diikuti bukan sahaja pada bulan Ramadhan tetapi seluruh bulan yang lain juga. Jadilah hamba Allah dan bukan hamba kepada Ramadhan sahaja.

Apa yang kita saksikan, terdapat sebahagian manusia yang tidak mengenal Allah melainkan hanya dalam bulan Ramadhan. Bahkan lebih malang lagi ada yang langsung tidak mengenal Allah sama ada dalam bulan Ramadhan atau selainnya, mereka berani meninggalkan kewajipan solat lima waktu sehari semalam sedangkan Allah SWT telah menjanjikan azab api neraka untuk mereka.

Oleh itu, peliharalah ibadah solat dan ajaklah ahli keluarga kita bersama-sama untuk menunaikannya secara berjemaah. Kerana solat adalah pembeza antara seorang muslim dengan selainnya. Diriwayatkan daripada Abu Abdullah bin Buraidah R.Anhu bahawa nabi SAW bersabda:

الْعَهْدُ الَّذِي بَيْنَنَا وَبَيْنَهُمُ الصَّلَاةُ فَمَنْ تَرَكَهَا  
فَقَدْ كَفَرَ



*"Perbezaan di antara kami dan mereka adalah solat, sesiapa yang meninggalkan solat maka dia telah kufur".*

*(Riwayat al-Tirmizi).*

Demikian juga amalan-amalan ibadah lain yang telah kita lakukan sepanjang bulan Ramadhan yang lalu hendaklah kita kekalkan seperti amalan solat berjemaah, membaca al-Quran, bersedekah dan lain-lain lagi.

### **Muslimin yang dirahmati Allah sekalian,**

Raikanlah kemenangan dan kegembiraan merayakan Idulfitri ini dengan saling ziarah-menziarahi menyambung silaturrahim dan berbuat baik kepada kedua ibu bapa. Sesungguhnya menyambung silaturrahim akan meluaskan rezeki dan memanjangkan umur. Sebaliknya memutuskan hubungan persaudaraan mengundang azab di dunia dan di akhirat. Abu Bakrah R.Anhu berkata bahawa Rasulullah SAW bersabda yang bermaksud:

*"Tiada sebarang dosa yang dipercepatkan siksaannya pada hari akhirat seumpama dosa melampaui batas dan memutuskan silaturrahim".*

*(Riwayat Abu Daud).*

Justeru itu, sambungkanlah silaturrahim sama ada yang jauh atau yang dekat, berilah khidmat yang terbaik kepada kedua ibu bapa, dan tunaikanlah hak kepada sesiapa sahaja yang berhak mendapatkannya.

### **Tetamu Allah sekalian,**

Apa selepas Ramadhan ialah ketaatan yang berterusan. Apa selepas Ramadhan ialah istiqamah yang berpanjangan. Idulfitri adalah kemenangan selepas kepatuhan. Sebarkanlah kasih sayang, luaskan ukhuwwah dan hulurkan kemaafaan.



## Muslimin yang dirahmati Allah sekalian,

Sebagai peringatan penting daripada khutbah hari ini, mimbar mengajak muslimin sekalian melakukan perkara-perkara berikut:

1. Umat Islam hendaklah istiqamah dalam meneruskan ketaatan kepada Allah SWT selepas Ramadhan sebagai bukti keimanan dan akidah yang benar.
2. Umat Islam hendaklah menjauhi segala perkara yang bercanggah dengan syariat Islam ketika bergembira menyambut Hari Raya Idulfitri.
3. Umat Islam hendaklah membudayakan amalan ziarah-menziarahi menyambung silaturrahim terutamanya yang mempunyai hubungan kekeluargaan.
4. Umat Islam mestilah mengelakkan diri daripada sebarang aktiviti yang memudharatkan, merosakkan dan membahayakan sama ada kepada diri sendiri atau orang lain.

أَعُوذُ بِاللَّهِ مِنَ الشَّيْطَانِ الرَّجِيمِ  
وَالَّذِينَ يَنْقُضُونَ عَهْدَ اللَّهِ مِنْ بَعْدِ مِيثَاقِهِ وَيَقْطَعُونَ  
مَا أَمَرَ اللَّهُ بِهِ أَنْ يُوصَلَ وَيُفْسِدُونَ فِي الْأَرْضِ أُولَٰئِكَ  
لَهُمُ اللَّعْنَةُ وَلَهُمْ سُوءُ الدَّارِ ﴿٢٥﴾

*"Dan (sebaliknya) orang-orang yang merombak (mencabuli) perjanjian Allah sesudah diperteguhkannya, dan memutuskan perkara-perkara yang disuruh oleh Allah supaya diperhubungkan, serta mereka pula membuat*





kerosakan dan bencana di muka bumi. Mereka itu beroleh laknat, dan mereka pula beroleh balasan hari akhirat yang seburuk-buruknya.

(al-Ra'd: 25).

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ،  
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ  
الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ، إِنَّهُ هُوَ  
السَّمِيعُ الْعَلِيمُ.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ  
وَلِسَائِرِ الْمُسْلِمِينَ وَالْمُسْلِمَاتِ، فَاسْتَغْفِرُوهُ إِنَّهُ  
هُوَ الْغَفُورُ الرَّحِيمُ.

\*\*\*\*\*

Majid/Nurul  
21.05.2017



## KHUTBAH KEDUA

الْحَمْدُ لِلَّهِ الَّذِي جَعَلَنَا مِنَ الْمُسْلِمِينَ، وَرَزَقَنَا مِنَ  
الطَّيِّبَاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا  
شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.  
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى  
آلِهِ وَصَحْبِهِ وَمَنْ تَبِعَهُمْ بِإِحْسَانٍ إِلَى يَوْمِ  
الدِّينِ. أَمَّا بَعْدُ، فَيَا عِبَادَ اللَّهِ، اتَّقُوا اللَّهَ،  
أَوْصِيَكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

**Sidang Jumaat yang dirahmati Allah SWT,**

Mimbar Jumaat sekali lagi berpesan supaya kita sentiasa bertakwa kepada Allah SWT dan menyedari bahawa Islam mengajar kita supaya bersikap sederhana dalam segala amalan. Kita amatlah dituntut agar menampilkan kemuliaan akhlak, sikap dan keperibadian tinggi kerana Rasulullah SAW diutus untuk menyempurnakan akhlak dan sebagai rahmat bagi seluruh umat dan sekalian alam. Oleh itu marilah kita sentiasa memperbanyakkan solawat dan salam ke atas Nabi kita Muhammad SAW. Firman Allah SWT:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا  
صَلُّوا عَلَيْهِ وَسَلِّمُوا تَسْلِيمًا.



اَللّٰهُمَّ صَلِّ وَسَلِّمْ عَلٰى سَيِّدِنَا وَمَوْلَانَا مُحَمَّدٍ سَيِّدِ  
الرُّسُلَيْنِ وَارْضَ اللّٰهُمَّ عَنْ اَصْحَابِهِ وَقَرَابَتِهِ  
وَاَزْوَاجِهِ وَذُرِّيَّاتِهِ اَجْمَعِينَ.

اَللّٰهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ  
وَالْمُؤْمِنَاتِ الْاَحْيَاءِ مِنْهُمْ وَالْاَمْوَاتِ، اِنَّكَ سَمِيعٌ  
قَرِيبٌ مُّجِيبُ الدَّعَوَاتِ يَا قَاضِيَ الْحَاجَاتِ. اَللّٰهُمَّ  
اِنَّا نَسْأَلُكَ وَنَتَوَسَّلُ اِلَيْكَ بِنَبِيِّكَ الْاَمِينِ، وَنَسْأَلُكَ  
بِاسْمَائِكَ الْحُسْنٰى وَصِفَاتِكَ الْعُظْمٰى اَنْ تَحْفَظَ  
بِعَيْنِ عِنَايَتِكَ الرَّبَّانِيَّةِ وَبِحِفْظِ وَقَايَتِكَ  
الصِّمْدَانِيَّةِ، جَلَالَةَ مَلِكِنَا الْمُعْظَمِ سُلْطَانَ  
سَلَاطُور، سُلْطَانَ شَرْفِ الدِّينِ اَدْرِيسِ شَاهِ الْحَاجِ  
ابْنِ الْمَرْحُومِ سُلْطَانَ صَلَاحُ الدِّينِ عَبْدِ الْعَزِيزِ  
شَاهِ الْحَاجِ. اَللّٰهُمَّ اَدِمِ الْعَوْنَ وَالْهِدَايَةَ وَالتَّوْفِيقَ،  
وَالصِّحَّةَ وَالسَّلَامَةَ مِنْكَ، لَوْلِيَّ عَهْدِ سَلَاطُور،  
تَغْكُو اَمِيرِ شَاهِ ابْنِ السُّلْطَانَ شَرْفِ الدِّينِ اَدْرِيسِ  
شَاهِ الْحَاجِ فِي اَمْنٍ وَصَلَاحٍ وَعَافِيَةٍ بِمَنْكَ وَكَرَمِكَ



يَا ذَا الْجَلَالِ وَالْإِكْرَامِ. اَللّٰهُمَّ اَطْلُ عُمْرَهُمَا  
مُصْلِحَيْنِ لِلْمُوظَّفَيْنِ وَالرَّعِيَّةِ وَالْبِلَادِ، وَبَلِّغْ  
مَقاصِدَهُمَا لِطَرِيقِ الْهُدَى وَالرَّشَادِ.

Ya Allah, Engkaulah Tuhan yang Maha berkuasa, kami bersyukur kehadiran-Mu yang telah mengurniakan kami rahmat dan nikmat, sehingga kami dapat meneruskan usaha ke arah memperkukuhkan negara umat Islam, sebagai negeri yang maju, sejahtera dan berkebakikan dibawah naungan dan pimpinan raja kami sebagai ketua agama Islam di negeri ini.

Justeru kami pohon kehadiran-Mu ya Allah, tetapkanlah iman dan pegangan kami kepada Ahli Sunnah Wal-Jamaah, terimalah amalan soleh kami, suburkanlah jiwa kami dengan budi pekerti yang mulia, satukanlah hati-hati kami, kurniakanlah kami rezeki yang luas lagi barakah, kayakanlah kami dengan ilmu yang bermanfaat, lindungilah kami daripada bala bencana dan peliharalah kami daripada ajaran sesat seperti Syiah, Qadyani, dan lain-lain ajaran yang difatwakan menyeleweng dari ajaran Islam atau bertentangan dengan pegangan Ahli Sunnah Wal Jamaah. Ya Allah bukannya hati kami untuk mendirikan solat fardhu lima waktu, menunaikan zakat melalui Lembaga Zakat Selangor, mewakaf dan menginfaqkan harta melalui Perbadanan Wakaf Selangor dan Tabung Amanah Pembangunan Islam Selangor.



رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا قُرَّةَ أَعْيُنٍ  
وَأَجْعَلْنَا لِلْمُتَّقِينَ إِمَامًا. رَبَّنَا ءَاتِنَا فِي الدُّنْيَا  
حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ، إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ  
ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ  
وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٩٠﴾

فَاذْكُرُوا اللَّهَ الْعَظِيمَ يَذْكُرْكُمْ وَاشْكُرُواهُ عَلَىٰ  
نِعْمِهِ ۖ يَزِدْكُمْ، وَاسْأَلُوهُ مِنْ فَضْلِهِ ۖ يُعْطِكُمْ  
وَلَذِكُرِ اللَّهَ أَكْبَرُ وَاللَّهُ يَعْلَمُ مَا تَصْنَعُونَ.

\*\*\*\*\*